

SURANA PAUL MOBHAA-BHAANA TO TIMOTIUS

POGAU BHAA-BHAANA

Timotius sii samia Karasiteni tee o umuruna dhaangiapo amangura tee amboore i poropinsi Likaonia i Asia Maidhiidhi (i zamani sii-sii adhaangia i Turki), i sawetana poropinsi Kilikia, siitumo lipu minaana Paul. Paul apokawa tee Timotius wakutuuna lingkaana to rua mpearona i wakutuuna apakoleleaka Lele Malape i kota Lистра tee Derbe (kamata Tul. 16:1-2.) Incia amembali sabhangka tee mohambana Paul i nuncana karajaana. Amana Timotius o miana Yunani, tee inana o miana Yahudi. I nuncana *Surana Paul Mobhaa-bhaana To Timotius*, apogauaka talu hali tee dhaangia o pokaiana saangu tee mosagaanana.

Mobhaa-bhaana siitumo, kaudhaniaka to Timotius to so'alina manga kaadhari mosala modhaangiana i tanga-tangana jama'a. Manga kaadhari incia sumai satotuuna o kaadhari mominaakana i agamana miana Yahudi tee mominaakana i agama i sambalina kaadharina miana Yahudi moparacaeana ande o alamu sii amadhakimo, tee o giuna kasalaamati tangkanamo amembali atopotibhaaka ande o mia ako'ilimuu tee dhaangia o rahasia imatauna, tee tabeana ata'ati manga tutura, siitumo, tuturana inda imembaliakata takawi, tuturana manga giu

ikande inda momembalina ikande, tee uka o giu mosagaanana.

Sapadhana incia sumai, Paul aadhariakea uka tuaapa o carana a'urusu jama'a tee a'urusu ibaadati. Incia uka apaumbaaka to Timotius tuaapa o pemingkuina mia momembalina mojananina tee mohambana jama'a. Sabutuna o Timotius aadhariakea uka tuaapa o carana to amembalika bhatuana Isa Al Masi momalape tee aadhariakea tuaapa atanggojawapuaka bhari-bharia mia mopesuana momembalina jama'a.

Antona

Porikanaana pogau 1:1-2

Kaadharina jama'a tee manga mia mo'urusuna jama'a 1:3--3:16

Kaadhari to Timotius tee opea ikarajaana 4:1--6:21

Salamu

1:1-2

¹ Minaaka i Paul, rasuluna Isa Al Masi, moosena parintana Aulata'ala mangapasalaamatina, tee minaaka i Isa Al Masi iharaputa.

² To Timotius, iabhiku mboomo anaku karoku i nuncana iimani. Rahumati, kaasi, tee dhadhi malape minaaka i Amata o Aulata'ala, tee minaaka i Isa Al Masi Oputa Momalanga apoose tee ingkoo.

Pokaiana tee Kaadhari Mosaladhala

1:3-11

³ Wakutuuna bhekulingka i poropinsi Make-donia, iaku padhamo kupaumbako mamudhaakana usadhaadhaa umboore i Efesus, to uadhariaka manga mia iwe sumai, mamudhaakana manga incia inda aadhariaka kaadhari inda mobanara,

⁴ tee bholi aperangoi manga tulatula momangenge minaaka i opu-opuata tee bholi aparakisaa daftarana siwulu momarambe minaaka i opu-opuata, roonamo manga giu incia sumai soo aumbaaka pogera-gera tee inda atulungi incemapo uka mamudhaakana amembali aose haejatina Aulata'ala modhaangiana i nuncana iimanita.

⁵ Tujuana naasehati incia sii siitumo kaasi motiumbana minaaka i inca momangkilo tee minaaka i ngangaranda momangkilo tee minaaka i iimani mo'ihilasi.

⁶ Maka kaasi, dhaangia pia mia o mia inda modhadhina mboo sumai. Manga incia soo abhanabhanaka wakutuuna to pogau inda mokinguna.

⁷ Manga incia gauna amembali guruna Hukumuna Taurati, maka manga incia inda ama'anaia opea ipogauakana atawa manga hali ibhoasakana tee mpuu-mpuuna incana.

⁸ Ingkita tamataua ande o Hukumuna Taurati sumai amalape ande atopake tee cara mobanara,

⁹ tee tabeana tasadaria ande o Hukumuna Taurati sumai atopadhaangia mencuana to mia mobanara, maka to mia modorohaka tee mia momentagali, to mia madhaki tee mia mokodosa, to mia inda moko'agama tee mia mofikiriakana dunia, to mia mopekamatena amana tee inana,

tee bhari-bharia pande pekamatena mia.

¹⁰ Tee uka to manga pande pebula, mopopeeluna podho-podho umane, mia momanakona mia to apabhatuaia, pande pekagau, sakusii gau-gau, tee bhari-bharia giu inda mopokanana tee kaadhari mobanara,

¹¹ mboomo modhaangiana i nuncana Lele Malape momulia mominaakana i Aulata'ala Motopuji. Lele Malapemo sumai iparacaeaakana to iaku.

*Kasukuru roonamo Rahumatina Aulata'ala
1:12-17*

¹² Iaku kusukuru tee Isa Al Masi Oputa Momalanga. Incia adhawuaku kakaa mamudhaakana amembali kulaiania, tee Incia aabhiaku mia momembalina motoparacaea sabutuna Incia apiliaku to kupotibhaaka tugasi incia sii.

¹³ Garaaka i piamo itu kuhinaia, kusikisaa manga mia moosena Isa, tee kumasega tee manga incia. Maka o Aulata'ala amaasiakaaku, roonamo i piamo itu indapo kuparacaeaia tee indapo kumataua opea ipewauku.

¹⁴ Ataralabhi-labhi mpuu o rahumatina Kawasana Oputa to iaku. Incia aranganiakaaku tee adhawuakaaku iimani mamudhaakana kuparacaeaia tee kumaasiaka maanusia rangaku; bhari-bharia sumai atolentu iimani tee kaasi mominaakana i Isa Al Masi.

¹⁵ Kaadhari incia sii abanara tee alaenga mpuu atotarima, "Isa Al Masi aumba i nuncana dunia to apasalaamatiaka mia mokodosa," tee minaaka

i kabharina mia mokodosa sumai iakumo mokodosana mpuu.

¹⁶ Maka rampaakanamo giu incia sumai o Aulata'ala amaasiakaaku, tee i nuncana karoku, mia molabhina dosana minaaka i mia mosagaanana sii, Isa Al Masi asusuakaaku bhari-bharia kasabarana inda momentela, tee mboo sumai iaku kumembali sandarana karo to bhari-bharia mia bhemoparacaeia naile itu tee bhemopotibhaakana dhadhi mobakaa.

¹⁷ Aulata'ala o Raja sa'umurua zamani, Incia alaenga atohoromati tee atopuji torosu, Incia abakaa, inda atokamata tee Incia sakaro-karona o Aulata'ala! Aamin.

Tugasina Timotius

1:18-20

¹⁸ E anaku Timotius, siimo parinta idhawuakaku to ingkoo, pokaiana tee pogauna manga nabii tee opea bhemomembalina tee karomu, mamudhaakana apokana tee opea mopadhana ipekilalaaka sumai, ingkoo upotimbe i nuncana potimbea momalape,

¹⁹ tee utorosu uparacaea tee Al Masi, tee umpuu-mpuu umembali upaposala mobanarana tee mosalana. Dhaangia manga mia inda mofaduliakana manga giu incia sii, sabutuna o iimanina manga incia ahancuru.

²⁰ I tanga-tangana manga mia mopewauna mboo sumai dhaangiamo Himeneus tee Aleksander, tee manga incia padhamo kupasaraakaakea i Ibilisi mamudhaakana apengkaadhari aunto ahina Aulata'ala.

2

Kapaumba to Jama'a Mamudhaakana Ado'a 2:1-7

¹ Rampaakanamo sumai bhaa-bhaana iaku kunaasehatiakako to uemani mpuu i Aulata'ala, udo'a, uemani safa'ati, tee uemani sukuru to bhari-bharia mia,

² tee udo'aaka uka to manga raja tee bhari-bharia kaogesa mamudhaakana tadhadhi tapomalape tee maanusia rangata tee ta'amani i nuncana tapewau opea molaengana ipewauta sabutuna ingkita tadhadhi tatanangi tee tatohoromati.

³ Manga do'amo mboo sumai momalapena tee ipeeluna Aulata'ala Mangapasalaamatina.

⁴ Gauna Incia mamudhaakana bhari-bharia mia atopasalaamati tee amatau kabanara pokaiana tee Al Masi.

⁵ Roonamo tangkanamo sakaro-karona o Aulata'ala, tee sakaro-karona Mopapomalapena pendua Aulata'ala tee maanusia, siitumo Isa Al Masi, tee Incia uka o maanusia.

⁶ Isa o mia mopadhana mopasaraakaakana karona mamudhaakana maanusia atopabebasi minaaka i manga dosana. Kajadia incia sumai Aulata'ala asusuakea i wakutuu mopadhana itantuakana, to amembali bukutii ande Incia gauna mamudhaakana bhari-bharia mia abebasi minaaka i dosana,

⁷ tee rampaakanamo giu incia sumai, iaku apatotapuaku to kumembali samia rasulu tee kumembali samia guru moadhariakana Lele

Malape mobanara to mia inda motolentuna mi-
ana Yahudi. Opea ipogauakaku sii abanara tee
inda kugau-gau.

*Tuturana Ibaadati to Umane tee Bhawine
Wakutuuna i nuncana Jama'a*

2:8-15

⁸ Rampaakanamo sumai iapai-iapaipo uka
ingkomiu uporomu, kapeeluku mamudhaakana
bhari-bharia umane atanempe limana
momangkilo tee ado'a inda tee a'amara atawa
apogera-gera.

⁹ Mboomo uka manga bhawine, manga incia
tabeana apaajo karonaa tee cara molaengana tee
apake pakea moko'adati, tee momalapena podho
sakawana. Manga incia bholi ataralabhi-labhi
apiia o buluana, bholi apake bulawa, muntia,
atawa pakea momaalina haragaana,

¹⁰ maka manga incia tabeana apaajo karonaa
tee fe'eli momalape. Mboo sumaimo tabeana o
giu molaengana ipewauna bhawine mo'akuina
a'ibaadati i Aulata'ala.

¹¹ Manga incia tabeana atanangi, apengkaad-
hari, tee ata'ati.

¹² Iaku inda kuundaakea o bhawine aadhari
tee aparinta umane, maka tabeana manga incia
bholi tee uu'uuna.*

¹³ Roonamo Nabii Adamu mobhaa-bhaana
ipadhaangia kasiimpo Hawa,

2:9 2:9 1Ptr. 3:3. * **2:12 2:12** *bholi tee uu'uuna:* Aipomo
ma'anana manga bhawine bholi apogau wakutuuna dhaangia tee
umane moadharina manga mia i nuncana jama'a. **2:13 2:13**
Bhaa. 2:7; 2:21-22.

¹⁴ tee mencuana Adamu mototipuna, maka o bhawinemo sumai, sabutuna incia amandawu i nuncana dosa.

¹⁵ Maka moomini mboo sumai o bhawine bheatopasalaamati alaloi apalaahiri anaana, somanamo incia asadhaadhaa aparacaea tee amaasiaka mia mosagaanana tee adhadhi mangkilo tee amembali ataangi karona minaaka i giu momadhaki.

3

Giu Ipewau to Tamembaliaka Kapalana Jama'a 3:1-7

¹ Atotuu uka o pogau incia sii, "Mia bhemo-membalina kapalana jama'a, satotuuna gauna bheapotibhaaka karajaa momulia."

² Rampaakanamo sumai o kapalana jama'a tabeana o mia inda mokokasalaha, bhawinena samiaamea, amembali ataangi karona minaaka i giu momadhaki, a'aarifu, ako'adati, sadia amalape atarima tamu i bhanuana, tee amakidha aadhari mia.

³ Incia uka mencuana mia momenturuna mopobusu atawa o pande malango, maka tabeana o mia momaluluna bhatangana pogauna, inda mopeeluna mopotagali, tee mencuana mia mosintaina doi.

⁴ Incia tabeana amembali kapala rumatangga momalape, tee manga anana aadharia mamudhaakana ata'ati tee ahoromatia.

⁵ Roonamo ande o mia inda momembalina mo'urusuna rumatangga karona, incia inda bheakapoia a'urusu jama'ana Aulata'ala.

⁶ Incia mencuana mia siimpo motobana, ancotala amembali mia mosombo kasiimpo akangkanaia kahukumu mopokanana tee itarimana Ibilisi.

⁷ Incia uka tabeana o mia momalapena sarona i matana manga mia modhaangiana i sambalina jama'a, mamudhaakana inda ahinaia mia tee apesua i nuncana katapuna Ibilisi.

Giu Ipewau to Tamembaliaka Mia Molaianina Jama'a

3:8-13

⁸ Mboomo uka tee manga mia molaianina jama'a. Manga incia tabeana ako'adati, inda abhatu dhela maka arela totona incana, mencuana pande sumpu, tee inda apeelo laba tee cara madhaki.

⁹ Manga incia tabeana amakate o ngangaran-dana tee apengkeni i kabanarana rahasiaan iimanina ipaumbaakana Aulata'ala i ingkami.

¹⁰ Manga incia tabeana aporikana atouji, ande atotuu-totuu inda tee kasalahanana, siimpo atoundaaka amembali mia molaianina jama'a.

¹¹ Mboomo uka o bhawinena manga incia tabeana alaenga atohoromati, mencuana pande fitanaa, amembali ataangi karona minaaka i pewau momadhaki, tee incia amembali atoparacaea i nuncana bhari-bharia giu.

¹² Bhari-bharia umane molaianina jama'a tabeana saminamea o bhawinena, tee amalape a'urusu manga anana tee rumatangana.

¹³ Manga incia mopadhana molaianina jama'a pekalape apotibhaaka kauncuramaka momalape

tee ahanda ayaakini tee Isa Al Masi i nuncana iimanina.

Jama'ana Aulata'ala o Fondasi tee Ariina Kabanara

3:14-16

¹⁴ Iaku kuharapu indamo amangenge bhekuleongiko. Maka moomini mboo sumai, kuburiakako uka sura incia sii,

¹⁵ mamudhaakana ande kukabusi tee ande indapo kukawa, ingkoo bheumataumea tuaapa o laengana mia mamudhaakana amembali adhadhi i nuncana rumatangana Aulata'ala, situmo o jama'ana Aulata'ala modhadhi, momembalina ariina tee fondasina kabanara.

¹⁶ Ingkita ta'akuia ande amaoge mpuu o hasiana kasaalihita:

"Aulata'ala aumba tee adhadhi i dunia sii
amembali bhanguna maanusia tee bada mokodagi,
apabanarea i nuncana Rohi,
akamatea manga malaa'ekati,
l Elena atoresa i bhari-bharia lipu,
Incia atoparacaea i nuncana dunia
tee atoangka i kamuliangina sorogaa."

4

Tugasina Timotius Wakutuuna Apoaroaka Manga Guru Mosaladhala

4:1-16

¹ Rohina Aulata'ala atindamo mpuu apogauakea ande naile itu bheadhaangia manga mia momurutadina tee mountona moosena Al Masi. Manga incia bheata'ati manga rohi

mopasaladhalana mia tee aose kaadharina manga seetani.

² Kaadhari incia sumai apakawaakea alaloi fe'eli munaafiki momenturuna ipewauna manga pande gau-gau. Ngangarandana manga incia abhatumo sabutuna manga incia uka inda amembali apaposala pewau mobanara tee pewau mosala.

³ Manga incia alarangi mia to akawi tee inda akande manga giuna ikande. Garaaka manga kinande incia sumai ipadhaangiana Aulata'ala mamudhaakana atokande tee kasukuru to manga mia mosaalihi momatauna kabanara.

⁴ Bhari-bharia ipadhaangiana Aulata'ala sumai amalape tee inda dhaangia saangu uka moharamuna ande o mia atarimaia tee kasukuru,

⁵ roonamo bhari-bharia sumai apekangkiloa firimanina Aulata'ala tee do'a.

⁶ Ande bhari-bharia giu incia sumai uudhaniakea to witinaita, ingkoo bheumembali mia molaianina Isa Al Masi momalape tee upadhamo utopekaoge tee kabanarana iimani tee kaadhari momalape mopadhana iosemu.

⁷ Bholi sampeampearo upo'urusu tee manga tulatula mosaladhala tee manga tulatula inda motomatauna asalana minaaka i opu-opuata. Paramananeaia o karomu tee kasaalihi,

⁸ roonamo:

"Upekatangka badamu saidhemea o fa'edana,
maka ande usaalihi abhari mpuu o fa'edana,
roonamo i nuncana kasaalihi dhaangia tee giu
mopadhana ipojanjiaka,
malape to dhadhita sii-sii

atawa to dhadhita naile itu."

⁹ Opea ipogauaka sii abanara tee alaenga atotarima tee atoparacaea.

¹⁰ Siitumo sababuna, tampuu-mpuumo taman-guleakea tee ta'usahaakea, roonamo ingkita tadhika kaharaputa i Aulata'ala modhadhi. Incia mopasalaamatina bhari-bharia maanusia, tee mohususuna ipasalaamatina siitumo bhari-bharia mia moparacaeaia.

¹¹ Adhariakea i jama'ana Kawasana Opu bhari-bharia giu incia sumai tee uparintaakea mamudhaakana aosea.

¹² Inciamo ingkoo dhaangiapo umangura, maka bholi dhaangia mopanda'enteko rampaakanamo umurumu. Pamembalia o karomu sandarana manga mia moparacaeana opea mopadhana ibhoasakamu tee bhari-bharia pemingkuimu, kaasimu, iianimu, tee kangkilona karomu.

¹³ Sakawana kumba, ingkoo utorotorosu ubaca Kitabi Momangkilo to manga mia, uudhaniakea tee uadharia.

¹⁴ Maheruakea o rahumati modhaangiana i nuncana karomu, siitumo kapooli mopadhana idhawuakana to ingkoo alaloi pogau ipakawaakana i manga nabii wakutuuna manga kapalana jama'a adhika limana i bhawona bhaamu.

¹⁵ Karajaamea bhari-bharia giu incia sumai tee mpuu-mpuuna incamu, tee utorotorosu uta'atia mamudhaakana o iianimu mohandana mojulu sumai akamatea bhari-bharia mia.

¹⁶ Jagania o karomu tee opea mopadhana

iadhariakamu, tee bhari-bharia giu incia sumai tabeana upewaua pekatangka, roonamo ande upewau mboo sumai, ingkoo bheupasalaamati karomu tee mia moperangoiko.

5

Mowaajibuna Ipewau to Manga Mia Mosa'agama

5:1-2

¹ Bholi ukasara ande uudhaniaka manga umane momancuana, maka uudhaniakea mboomo upogau tee amamu, tee manga umane momangurana dhadhina uudhaniakea mboomo witinaimu umane.

² Udhaniakea manga bhawine momancuana mboomo inamu tee uudhaniakea manga bhawine momangurana dhadhina mboomo andimu tee cara momangkilo mpuu.

Mowaajibuna Ipewau to Iaiaro

5:3-16

³ Horomatia manga bhawine iaiaro* inda mokowitinai momembalina mohambana manga incia, ma'anana, ukamatea opea ifaraluuna manga incia.

⁴ Maka ande samia iaiaro dhaangia tee anana atawa tee opuana, taroakamo anana atawa opuana sumai aporikanapo apengkaadhari alaiani Aulata'ala tee aperangoi opea ifaraluuna witinaina karona. Tee mboo sumai, manga incia amembali abholosi kalapena mancuanana tee

* **5:3 5:3** *manga bhawine iaiaro*: ma'anana iaiaro i aeati incia sii satotuuna iaiaro momatena umanena mencuana iaiaro mopobholiakana dhadhi.

opuana, tee giu incia sumai amasanaakea incana Aulata'ala.

⁵ Bhawine iaiaro modhadhina samia-miana tee inda tee modhambaakea, tangkanamo aharapu i Aulata'ala. Eo tee malo incia atorotorosu ado'a tee aemani tulungi i Aulata'ala.

⁶ Maka o iaiaro modhadhina tangkanamo to apeelo kasanaana karona i dunia satotuuna am- atemo rohina, moomini o badana dhaangiapo adhadhi.

⁷ Udhaniakea uka manga giu incia sumai to manga iaiaro sumai, mamudhaakana manga incia adhadhi inda tee kasalahana.

⁸ Maka ande dhaangia o mia inda mojananina witinaina tee miana bhanuana, incia apokanamo tee amurutadi, tee alabhi o kadhakina minaaka i mia inda moko'iimani.

⁹ Daftaraakea o iaiaro moko'umuruna tapanamo saidhe nama pulu tao, tee tangkanamo sampearomea akawi,

¹⁰ tee o kalapena pewauna iaiaro sumai am- ataua mia bhari, ande incia amalape adham- baaka ana-ana, sadia amalape atarima tamu i bhanuana, ahamba manga mia moparacaeana tee Isa, ahamba manga mia monaraka, tee araji apewau manga giu momalape.

¹¹ Maka bholi udaftaraaka manga iaiaro mo- mangurana dhadhina, roonamo manga incia al- abhiaka birahina to akawi tee inda amaheruaka pojanjiana tee Al Masi,

¹² sabutuna manga incia apotibhaaka kahukumu roonamo ahianati pojanjiana mobhaa-bhaana sumai.

¹³ Tee uka, ande o iaiaro mangurana dhadhina atodaftaraaka, manga incia bheamembali mia momangare, tee momadhakina uka, manga incia bheapepadhai wakutuuna tee alingka i bhanuana manga mia, apogauaka kadhakina mia mosagaanana, a'urusu urusana mia mosagaanana, tee apogauaka manga giu inda molaengana ipogauaka.

¹⁴ Rampaakanamo sumai o kapeeluku manga iaiaro momangurana dhadhina akawi pendua, akoana, tee a'urusu rumatangana mamudhaakana manga musuta inda tee kalalesana to apekadhaki sarota.

¹⁵ Satotuuna dhaangiamo manga iaiaro mosaladhala tee moosena Ibilisi.

¹⁶ Maka ande dhaangia o bhawine moparacaeana tee Isa mokowitinaiakana samia iaiaro, sumaimo incia tabeana ahambea mamudhaakana inda arangani katamona bhawana jama'a, tee mboo sumai o jama'a amembali ahamba manga iaiaro mosagaanana inda mokowitinai.

Pia-pia Angu Kaadhari tee Kaudhaniaka

5:17--6:2a

¹⁷ Kapalana jama'a momalapena pewauna wakutuuna akapalai jama'ana, alaenga atarima ponambo tee kahoromati, siitumo to manga kapala morajina moadhari tee mopakawaakana hotubaa.

¹⁸ Roonamo mboomo sii o antona Kitabi Momang kilo, "Sapi motangasaana molandalandakina gandum to apapogaa kulina tee ompolena,

bholi ubhokea o ngangana," mboomo uka, "Mia mokarajaa, alaenga apotibhaaka ponambona."

¹⁹ Bholi ulausaka uparacaea ande dhaangia o mia moraeakana kapalana jama'a, maka tabeana dhaangia rua mia atawa talu mia mokamatea apewau kasalaha, siimpo umembali uparacaeaia.

²⁰ Ande dhaangia o mia motorotorosuna mope-wauna dosa, ingkomiu tabeana usasia i aroana mia bhari, mamudhaakana manga mia mokamatea amaeka.

²¹ I aroana Aulata'ala tee Isa Al Masi tee uka i aroana manga malaa'ekati ipilina, iaku kuudhaniakako mamudhaakana ingkoo uose bhari-bharia isusuakaku sumai. Pewaumea bhari-bharia giu incia sumai to bhari-bharia anggotana jama'a tee bholi ukoakoalaaka tee bholi uala kambotu ande indapo umataua kadhaangia mosatotuuna.

²² Bholi ukaago-ago udhika limamu i bha-wona bhaana mia to ulantia amembali bhatuana Kawasana Opu. Ande o mia mosagaanana akodosa, bholi uala tanggojawapu minaaka i dosana mia sumai tee umembali usala. Jagania o karomu mamudhaakana usadhaadhaa umangkilo.

²³ Tapale-palei pogau, to karomu bholimo soo usumpu uwe, maka uranganiakea uka tee saidhe angguru, roonamo kompomu tee roonamo ingkoo umenturu umapii.

²⁴ Dosa-dosa ipewauna sagaa minaaka i manga mia alausaka atokamata sabutuna kabilanga o dosana sumai aporikanaaka manga incia i pangadila. Maka o dosa-dosana manga mia mosagaanana inda atokamata, tee siimpomo bheatokamata naile itu.

²⁵ Mboo sumai uka ande dhaangia o kalape ipewauna, tee o pewauna sumai amembali alausaka atokamata. Moomini o pewauna sumai inda atinda akamatea mia mosagaanana, maka o giu incia sumai inda amembali atorotorosu atobuniaka.

6

¹ Udhaniakea bhari-bharia jama'a momembalina bhatua tabeana aabhia o opuna amembali mia molaengana ihoromatina tee mpuu-mpuuna incana, mamudhaakana o saron Aulata'ala tee kaadharita inda atohina.

^{2a} Ande dhaangia o bhatua tee opuna o mia moparacaeana tee Isa, bholi apanda'entea atawa akura ahoromati opuna rampaakanamo podhopotdho witinai sa'agama. Maka manga incia tabeana ahanda amalape alaiani opuna, roonamo opuna ilaianina sii o witinai sa'agama imaasiakana.

Guru Mosaladhala tee Bholi Laulauna Tasintai Doi

6:2b-10

^{2b} Adhariakea tee uudhaniakea bhari-bharia giu incia sii.

³ Ande o mia adhariaaka kaadhari mosala tee inda aose kaadhari mobanara siitumo firimanina Oputa Momalanga Isa Al Masi, tee inda apokana tee kaadharina mosaalihi,

⁴ sumaimo incia satotuuna o mia mosombo tee inda amatau opeopea. Panyakina mia incia sii aunde ande apogera tee apotagali, sabutuna aumbaaka pogigibulu, poraeraeaka, pofitanaa, tee pocuricurigai momadhaki,

⁵ tee posalama'ana i tanga-tangana manga mia mokofikirina madhaki, momaridhona minaaka i kabanara tee moabhina kasaalihi sumai amembali carana to apotibhaaka karangkaea.

⁶ Kasaalihi mopoosena tee katumpuna inca inciamo bheaumbaaka laba momaoge

⁷ roonamo ingkita inda tabhawa opeopea i nuncana dunia sii, tee ingkita uka inda amembali tapalimba opeopea minaaka i dunia sii.

⁸ Jadi, ande dhaangia tee kinande tee pakea, ingkita bheatumpu incata tee giu incia sumai.

⁹ Maka, manga mia mogauna morangkaea atilombu i nuncana kapancoba tee akanea katapu i nuncana sagala giuna nawusuu tee uka manga haejati mosala bhemoumbaakana balaa. Manga giumo incia sumai mopatonduna mia i nuncana kahancuru tee kabinasa.

¹⁰ Sala saangu giu moumbaakana sagala giu kadhaki roonamo laulauna tasintai doi. Dhaangia manga mia mosaladhalana minaaka i iimanina tee asikisaamo karonna tee sagala giuna kanarakaa roonamo manga incia laulauna apeelo doi.

Kasamea Kapadhaa

6:11-21

¹¹ Maka ingkoo, e bhatuana Aulata'ala, palaimo minaaka i bhari-bharia giu incia sumai tee uosemo mia mobanara, mia mota'ati, mia moparacaeana tee Isa Al Masi, mia momaasiakana maanusia rangana, mia mosabarana i nuncana kanarakaa, tee mia momaluluna o bhoasakana pogauna.

¹² Usahamo i nuncana potimbeana iimani mobanara tee ukeniaka dhadhi mobakaa, sababuna rampaakanamo giu incia sumai o Aulata'ala akembako, siitumo wakutuuna u'akuia i aroana mia bhari ande ingkoo uparacaea tee Isa Al Masi.

¹³ Tee sii-sii, i aroana Aulata'ala mopadhadhina bhari-bharia giu tee i aroana Isa Al Masi modhawuna kasakusii mobanara i aroana Pontius Pilatus, iaku kuposamea tee ingkoo:

¹⁴ Ta'atia bhari-bharia parinta incia sii tee mpuu-mpuuna incamu tee bholi upewau kasalaha sakawana o Isa Al Masi Oputa Momalanga aumba pendua.

¹⁵ Umbaana sumai bheatantuakea Aulata'ala i wakutuu iabhina amalape, roonamo Incia o rajana bhari-bharia raja tee molabhina kalangana minaaka i bhari-bharia momalangana.

¹⁶ Incia o Aulata'ala sakaro-karona inda momembalina momate, momboorena i nuncana kainawa inda momembalina isarina incemapo uka. Inda dhaangia samia maanusia uka mopadhana tee momembalina mokamatea. To Inciamo o kahoromati tee kamuliangi sa'umurua! Aamin.

¹⁷ Udhaniakea manga mia morangkaea i dunia sii mamudhaakana manga incia inda asombo tee inda aharapu tee harataa inda mobakaa, maka tabeana aharapu i Aulata'ala. I nuncana sagala karangkaeana, Incia mangadhawuakana bhari-bharia opea ifaraluuta mamudhaakana tani'imatia.

¹⁸ Udhaniakea manga incia mamudhaakana apewau giu malape, ngangarandana

arangkaeaaaka giu malape, inda akailiili apekadhawu tee abage-bage harataana.

¹⁹ Tee cara mboo sumai manga incia padhamo arombusaka harataa i sorogaa momembalina fondasi momatangka to karona naile itu, mamudhaakana tee giu incia sumai manga incia apotibhaaka dhadhi mobakaa, siitumo dhadhi satotuuna.

²⁰ E Timotius, jaganja pekalape opea mopadhana iparacaeaaaka to ingkoo. Pekaridhoa o karomu minaaka i manga mia mobhoasakana giu inda mokoguna, tee upekaridhoa o karomu minaaka i mia inda mohoromatina Aulata'ala tee mia momenturuna mopotagali. Giu incia sumai manga incia asarongia "katau," maka satotuuna mencuana katau.

²¹ Rampaakanamo giu incia sumai dhaangia o mia mosaladhala tee abholi iimanina tee Isa Al Masi iparacaeana i piamo itu. Maasangia o Aulata'ala arahumatikomiu.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3